



الحلقة ٨

1. تفريغ الحلقة

التوقيت	النص
0:00	<p>بالحلقة الماضية حكينا عن أهمية البحث كمعيار موضوعي يساعد صناع البودكاست على تطوير محتواهم. بهاي الحلقة رح نحكي عن معايير أخرى من المهم استخدامها لتقييم الفكرة الأولية.</p> <p>سبق وذكرت انو اهتمامنا، كصناع بودكاست، بفكرة معينة مش كافي لتنفيذها. وهلاً بضيف انو حتى لو اكتشفنا بعد ال Market Research او ال Literature Review انو فكرتنا مبتكرة وما في حد طرحها من قبل، هاد برضه ما بيعني انو فكرتنا قابلة للتنفيذ.</p> <p>طبعاً من المهم انو يكون عنا شغف وحماس اتجاه الفكرة، ومن المهم انو نقدم فكرة جديدة، هاد اشى مؤكد، ولكن من المهم كمان بنفس الوقت نتأكد انو الفكرة مرغوبة، وقابلة للتطبيق.</p>
00:49	<p>طيب كيف منعرف إذا الفكرة مرغوبة؟ سؤال يطرح نفسه.</p> <ul style="list-style-type: none">• كثير مهم قبل ما اتباشروا بتنفيذ مخطتكم انكم تسألوا الناس اللي حوالكم إذا مهتمين بالموضوع والزاوية. ممكن حتى تعملوا استطلاع رأي أو استبيان تقوموا بنشره على منصات التواصل الاجتماعي. طبعاً النتيجة مو شرط تكون دقيقة وغالباً ما رح تكون تمثيلية ولكن ممكن تساعدكم بتقييم الفكرة وممكن معارفكم يقوموا بطرح بعض التعليقات أو التعديلات اللي تخليكم اتطوروا من الفكرة.
01:27	<ul style="list-style-type: none">• إضافة لجس النبض بشكل عام يكون كثير منيح لو قدرتوا تربطوا موضوعكم بحالة آنية.. طبعاً مش القصد انو الموضوع لازم يكون بيعالج قضية لحظية ولكن يكون على الأقل في نوع من الربط ما بين الموضوع والوقت الحالي.. يعني مهم اتجاوبوا على السؤال اللي غالباً رح يتسائله معظم المستمعين واللي هو: شو أهمية الموضوع؟ كيف ممكن الموضوع يآثر على حياتي اليوم؟ مهتمكم كمنتجي بودكاست انه تقوموا بالإجابة على هذا السؤال وتحاولوا اتبرروا اختياركم للموضوع.

يعني مثلاً لنفترض اخترتوا موضوع البذور في المنطقة العربية اللي حكينا عنه من قبل.. يمكن كثير من المستمعين يستغربوا من الموضوع ويقرروا ما يسمعون البودكاست لأنه مش شايفين الأهمية.. عشان هيك كثير مفيد انو تذكروا مستمعيكم ليش ممكن الاستماع لهيك موضوع يعود عليهم بأثر إيجابي. ومش شرط يكون هالأثر كثير كبير..

ممكن بكل بساطة تشاركوهم وجهة نظركم انو مهم نعرف أنواع المحاصيل المختلفة لأنه بنظركم هاي هي الخطوة الأولى لإحياء الزراعة اللي عم بتدهور بالمنطقة العربية.

02:36

بعد استطلاع آراء اللي حواليكم وتبريركم للموضوع اللي اخترتوه بصير أسهل عليكم تتأكدوا إذا فكرتكم بالفعل في طلب عليها أو على الأقل مرغوبة، هل هاذ بيعني انو ممكن اتباشروا بتنفيذ الفكرة على طول؟ لأ.. بضل تسألوا حالكم سؤال أخير حول واقعية الفكرة.

لنفترض كنت حابة أنتج بودكاست حول أوضاع المعتقلين السياسيين في المغرب رغم إقامتي بلبنان، وحابة بكل حلقة أقابل أحد المساجين.

قبل ما انفذ الفكرة مهم أسأل نفسي إذا رح أقدر أتواصل مع المساجين عن بعد ولا مضطرة أسافر على المغرب، وإذا تبين انو السفر لا بد منه، هل عندي التكاليف الكافية للسفر؟ وحتى لو سافرت هل رح يتم السماح بدخولي إلى السجن؟ ولنفترض جدلاً إنني قدرت أوصل للمساجين هل رح أفهم على اللهجة المغربية من غير ما يكون معي حدا مغربي؟

الإجابة على هاي الأسئلة رح اتأكدلي إذا الفكرة قابلة للتطبيق أو خارجة عن نطاق المصادر والقدرات المتاحة عندي.

03:35

طبعاً مش شرط أسقط الفكرة كلها إذا تبين إنو الموضوع غير واقعي. ممكن أعدل عليها لحتى تتناسب مع قدراتي

عملية تطوير وبلورة الفكرة تنطبق على البودكاست بشكل عام ولكنها أيضاً تنطبق خلال عملكم على المواضيع الفرعية لكل حلقة.